

佛說長者子制經

敢

後漢安世高譯

聞如是一時佛在羅閱祇者閼崛山中時與五百沙門俱皆阿羅漢平旦皆被袈裟持鉢入城乞食時城中有四姓豪貴家園中第一所居高燥舍宅樓觀甚好垣牆周匝七重門四姓豪家子檀尼迦奈有一子字制年十六父檀尼迦奈歿故制獨與母居佛時到其家乞食時制在內第三門住遙見佛來制即念言是人何壹端正絕好乃余好如明月珠光明如日月其色如黃金如月十五日感滿時佛住於門外制便走入語母言我見一人來大端正絕妙天下無有輩我生以來未曾見人如是今在門住欲乞白制語母當乞之其母大慳貪不肯白與制言母當哀用我故白與是人與是人者如病者得良醫制復言與是人者名字達於天上天下是人今續在外住其母復不肯白制數數語母不止母便恚語制言汝燒我不止

長者子制經 第三張 敢

轉前

者汝令我煩亂母言是人不用是乞白故來但欲欺調汝耳今汝小癡兒當何等知汝所索不止者會得我捶杖乃止耳佛預知其母慳貪佛便放威神徹照七重門內制見佛光明心大歡喜制即復到母所答語言愚人不知布施譬如盲人墮火中其人但坐無目故世間人但坐慳貪不信布施後當得其禍人心念惡口言惡身行惡愚癡不信佛不信經不信比丘僧死後皆墮地獄中餓鬼畜生中人慳貪信布施後得其福身行善口言善心念善自得其福其人家常當與智者相隨今人有智制言母不肯白與者自持我今日飯分來我寧一日不食哀我疾持來我欲與是人恐是人弃我去是人弃我去是人難值其母復不肯與制便自往取飯分復取所著好衣持去至佛所前以頭面著佛足却住叉手白佛言持我所有衣被飯願上佛佛默然不應制復白言今佛是天上天下人師當哀度脫我壽願為我受之當令我得福如是

長者子制經 第三張 敢

轉前

者三佛便受之制即大歡喜佛語制言今諸慳貪者汝皆伏之今日汝施與佛衣被飯食使汝心中諸欲願者亦皆得之制大歡喜復白佛言我所可願者亦不求作第二忉利天王釋亦不求作第七天王梵亦不求世世豪貴願使我智慧光明如佛佛言大善諸所願者皆令得之第二天王釋聞制語即在佛後叉手住天王釋便於佛前語謂制言汝今日持小飯食衣被與佛便欲求作佛者不能得也十劫百劫千劫萬劫億劫汝尚未能得作佛制報天王釋言我亦不用一飯食故欲得作佛我常當持善心精進不懈求佛不止會當作佛天王釋報制言汝持四寶須彌山汝慈心念天下人民千萬劫億萬劫汝尚未能得佛也制復報天王釋言譬如匠師持斧入山索樹木會當擇取好直者會當可意乃取耳我不用一飯食衣被故求作佛也天王釋復語制言汝欲求佛者劇苦汝不如求作第七梵若第二忉利天王釋汝欲求作佛難得

也制復報天王釋言汝寧見閻浮利
內不天王釋言見之制言滿其中大
火上天持身投其中我會當求作
佛終不止天王釋言汝滿閻浮利地
內其中火是中有人民畜生及蠕動
之類汝不當殺之汝口言惡心念惡
死當入地獄中汝當都作佛制報
天王釋世間人民及蠕動我持慈心
皆付弥勒佛弥勒佛自當度脫之我
求佛道會不止制復報天王釋言第
七梵眾第二天王釋所居止處會當衰
敗皆當歸死无有脫不死者天王釋
便叉手報制言卿持心堅乃如是念
欲求佛不止者卿會得作佛制復報
天王釋言汝莫持汝天上意自貢高
也復有勝汝者我持善心精進不懈
求佛不止會當得作佛天王釋便默
然無所復語佛便語制汝前後所承
事凡六万佛汝常當願求作佛汝常
持心精進承事諸佛却後二百億万
劫汝不復更地獄餓鬼畜生中却後二
百億万劫竟汝當作遮迦越王當有
十億小國皆屬汝汝當領四天下當

飛行汝所行當正壽盡當上生第七
梵天第四兜術天天上壽盡當復下
生作遮迦越王壽盡當復上生第七
梵天如是上下百億万劫竟汝當作
佛字須弥迦羅當度脫天上天下人
民汝生下地當照万二千億天地上
至二十八天上天地皆為大動夜明
如日出人民皆壽七千億歲汝身當
長二百丈當有万一千城城皆四百
八十里城皆板著之皆刻鏤金銀琉
璃水精珊瑚車渠馬瑙七寶汝作佛
時當再會說經一會時有六千億沙
門皆得阿羅漢第二會說經時有四
千億沙門皆得阿羅漢當尔時人民
无有偷盜者男子女人皆同一心無
有惡者亦无山林谿谷地皆平正人
民無有疾病憂苦皆安樂所居皆自
守天日三兩裁淹塵土人欲議語皆
大聚會夏月則不暑冬月則不寒皆
得中適汝教授精舍名為難提陀若
有男子女人持戒布施與佛辟支佛
阿羅漢求作佛者皆可得佛道不可
不求八方上下无有能窮極者佛智

慧如是天下人不知生所從來亦不
知死趣何道佛說經已制及諸比丘
僧皆前以頭面著佛足作礼而去
佛說長者子制經

癸卯歲高麗國大藏都監奉
勅彫造

佛說長者子制經

校勘記

- 一 底本，麗藏本。
- 一 一一四頁上二行「三藏」，資、磧、晉、南、徑、清作「三藏法師」。
- 一 一一四頁上二行末字「譯」，晉、南、徑作「初譯」。
- 一 一一四頁上五行第八字「城」，資、磧、晉、南、徑、清作「城各」。
- 一 一一四頁上一一行第六字「即」，資、磧、晉、南、徑、清作「自」。
- 一 一一四頁上一八行「哀用」，資、磧、晉、南、徑、清作「用哀」。
- 一 一一四頁中九行第六字「禍」，資、磧、晉、南、徑、清作「福」。
- 一 一一四頁下四行首字「亦」，資、磧、晉、南、徑、清無。
- 一 一一五頁上七行末字「報」，資、磧、晉、南、徑、清作「復報」。
- 一 一一五頁上一一行第三字「衆」，資、磧、晉、南、徑、清無。

- 一 一一五頁上一一行第一一字「止」，資、磧、晉、南作「此」。
- 一 一一五頁上一一行末字「衰」，資、磧、晉、南、徑、清作「壞」。
- 一 一一五頁中二行第六字「術」，徑、清作「率」。
- 一 一一五頁中一一行第一二字「汝」，資、磧、晉、南、徑、清作「法」。